

甯海州志卷三

疆域志

古蹟考

名勝之在天壤有興有廢某城某郭某臺觀亭榭曰此某代之建制也某水某邱曰某高士某隱逸之辟疆精舍也雪泥鴻爪指而豔之曰古之名勝今之古蹟也古而有蹟尚可憑眺古而無蹟亦當搜討此樵夫牧豎過而陋之者正騷人墨客爭爲憑弔而撫按之者也杜少陵云從來多古意臨眺獨躊躇嗚呼名勝興廢之繇豈偶然哉考古蹟

牟子國按顧炎武考古錄曰春秋以牟名國與地者有三桓公十

甯海州志

卷二

古蹟考

十三

五年牟人來朝注云國在泰山牟縣僖公五年公孫茲如牟娶焉其一則昭公五年牟夷以牟婁及防茲來奔路史曰密之諸城有婁鄉其一爲根牟宣公九年取根牟注云根牟東夷國也路史曰根牟曹姓子爵魯宣公取之杜預注琅邪陽都東南之牟鄉城樂史曰根牟國卽密之安邱隋之安邱縣舊志俱未分析故特注之據杜注云在泰山郡又云在城陽在琅邪而隋書云在嬴萊蕪志云在縣東路史則云在安邱至焦希程則曰周封牟子於齊在今壽光境內春秋時齊人忌其近於臨淄逼牟子於牟平以其在牟山平原爲名者也非始封牟子之牟然亦遂稱牟子國而牟山之牟固在也焦說近是

但壽光境內據齊乘不見牟跡或者

初封泰山郡春秋見逼於齊人遂播遷於壽光與因而又逼於
嬴於萊蕪於安邱城陽琅邪諸境併逼於東海上竊謂牟子或
卽路史所稱根牟耳路史注云根牟東夷國乃知萊夷之東復
有牟夷泰山郡爲魯地蓋當魯宣公昭公之世屢取根牟故漸
次播越終竄於東夷境而止焉理或然與故漢初建國仍
襲牟名以置二縣若云牟國有三厯考古書無能徵之矣

東牟城太平寰宇記曰東牟城在文登縣西北十里錢塘周兩勝

辨云寰宇記脫去百字元和志作一百十里按文登去甯海一百十里乃知古東

牟城卽今之甯海城也牟平之稱東牟亦猶萊州之稱東萊也
東牟之名或對泰山之牟縣而區別言之不然旣置東牟郡國
以轄文登而以牟平爲負郭邑何又於十里以內復
置一文登爲近屬幅員之密邇乃爾乎當從元和志

牟平城按東牟牟平秦爲齊東境漢置二縣王莽更張漢制改牟平曰望利改東牟曰宏德併設鈇官鹽官由諸書考之原

非一縣而後儒多不分析溯晉魏六朝以來廢置遷移沿革原
無定所固難詳核然東牟牟平剖符侯國總不離乎今之甯海

州境地魏書本注云西有之罘東距成山東牟郡城在焉隋書本

甯海州志

卷二

古蹟考

十四

注亦云西有九目山南有龍山而牟城城北七里牟山在焉爾
時兩水鎮俱轄於東牟故云爾也迨乎北齊暨唐又徙置於黃
縣之中郎城又徙治於蓬萊而遺址之見於諸書者聚訟紛紛
故尤難悉指確處據齊乘曰故牟平城在登州東南九十里漢
縣高齊天保七年移置馬嶺山寰宇記亦云高齊移於今之黃
縣東七十三里馬嶺山南于欽仍依寰宇記但未詳其地里遠

近按諸志書所云城因牟山之平原以侖名則故牟平城之當在甯海境也近是

育犁城按齊乘曰州西北八十里漢縣後漢省入牟平城在灑港

水側其地良沃故名育黎按甯海北距海十里據于欽所云西

南城陰鄉之城陰村南玉林集北玉林或俗呼育犁之訛犁聲
之轉也且州西北併無灑港之名灑港亦在州西南鐸水汪會

而入於南海城陰
蓋由是而得名與

睡城按齊乘曰在州東三十里秦漢負海縣後併入牟平唐初置

清陽縣後廢人文登城對之罘山臨清陽水故名清陽城漢志

清陽作聲洋丹水所出東北入海而解道虎又云不夜城在文

登東北八十里陽庭城南青城山側于欽乃云青城山即之罘

山也因睡名清陽城故之罘號青城山陽庭即睡城按之罘山聲洋水是

雨水鎮地今屬福山境內山川也于欽既曰對之罘山臨清陽水睡城自不當在文登北之陽庭若謂在州東三十里海岸上則與之罘猶東西相望而兩水鎮離文登之陽庭相距一百八十餘里矣思容之考地里非躬歷之者故不能確且丹水之名諸志書俱不載而土人亦無有知此水屬何境者按唐武德六年始置清陽廓定二縣於東牟郡其沿革猶去古未遠而清陽舊址已無確指而齊乘於廓定城又缺而未載此其咎在各邑乘之軼亡而不早為之登採也故至此耳

甯海州志

卷二

古蹟考

十五

康公城在州東十里田和遷齊康公於海上即此地也見焦志按

周安王十一年田和遷康公於海上使食一城今州東十里有

邨名莒城邨其地坦夷可建城或即此也惜無遺址可據北有

島亦名莒疑當時為田氏竄逼海曲或曰思舊莒而因以莒命

名與明王櫝有永康公城詩

清陽城冷泮林沿革考曰清陽縣在今海陽縣北百二十里地名古縣村即今青山鄉隸甯海矣

觀陽城後漢時置在甯海西南百里泠泮林沿革考曰觀水之陽

其地今名半城自雍正十三年分萊陽東境入甯海易甯海西

南境入海陽故觀陽舊在州西南也觀水名見于欽齊乘又隋

書云觀陽分置牟州唐初亦隸牟州後改隸登州故曰其地在

牟平矣

牟臺在牟山之東阜迤東而南前有叢祠下臨沁水南枕長隄喬木蔭森疑眸豁爽舊志稱牟臺秋望爲十景之一有牟平侯祠相傳爲牟侯別墅臺址現存

牟侯祠在盧山之東麓卽明王峴山也齊乘云峴山上有東牟侯祠今廢

劉會稽墓碑按 龍墓碑在養馬島東頭碑爲蔡中郎書後上官抵邑輒迂道往觀島人不勝繹騷遂沈諸海今泐夫人水猶見之惜無嗜古者募泐夫出焉以破疑竇

范園金范殿試懌之花園也舊志稱范園春曉爲十景之一范嘗

甯海州志

卷二

古蹟考

十六

與高巨才宴集其中有歸山琴操碑金大定二十三年九月丹陽馬鈺書又有元東山老人高曄撰元都宮記碑今現存並見寺觀

怡老亭在范園中久圯

鯉堂按 續夷堅志曰鯉堂在石落村麻姑於劉氏乞媿處詳見外

書麻姑傳據土人云石落村卽今之石頭河村也村中劉氏其舊姓也

麻姑大仙塚按 塚在仙堂下碑文已殘康熙閒周方山有姑餘山記云宋元豐碑載姑事甚詳蓋當周方山時記文猶親見之迄今未逮二百年碑失所在矣

先天觀據焦志云在州東南二里今遺址無可指矣按 史纂郝大

通甯海人朝散大夫俊彥之從弟也重陽真人見其資稟高古遂以背坐之機感啟之領悟遂仙蛻於先天觀

唐臣遺骸碣按碣在姑餘山椒麻姑墳之左巘凡六面石極堅緻

高三尺四寸下有石礎頂覆石蓋宋通直郎沈栩書大字徑三寸許凡五十五字面一行書法迺逸似黃蔡小字不滿寸面六行援發塚例及捕獲賞格條目字畫毫髮無闕至於唐臣事蹟爵里則莫之辨姑載焉以俟博古者碑文並載金石考

三教堂舊址不知其處按范殿試懌跋歸山操石刻後云吾鄉劉宜之郡城之北有庵一所寬閒深靚以館四方雲水之士命僧燭律主之鄜州王羽士鼓琴於此丹陽作琴操歸山得道一時

甯海州志

卷二

古蹟考

十七

文人多往遊詳見藝文范殿試跋後

九龍池在蒼山之麓崩崖對峙一石長二里許九坎皆圓春月吐溜涓涓澌澌清澈見底夏日則飛瀑奔湍風激懸流如撒珠歎雪濺人衣裾故龍池歎雪爲十景之一真奇觀也詳見周方山九龍池記焦希程有詩俱載藝文

烟霞洞天在姑餘山之西巖金大定間陝右王嘉來甯海攜七真人始闢此洞丹竈猶存當時咸異之舊志稱石洞烟霞爲十景之一

飛泉居在烟霞洞三峰崑之側明季登郡戚兆伯避地來隱於此

構室三楹今遺址尚可指

按曲嵐西月方有譟飛泉居記石刻現存記見藝文

舍利寶塔在彌勒寺

詳見寺觀

清白亭按焦志在州治內蓋金元時重修也碑存而亭廢今碑亦失所在

矣

二喜亭按焦志亭在西郊外大路北東西廣九丈西牆南北長十三丈東牆南北長八丈舊總

舖也知州李光先建李光先既置總舖於州治乃以此為送迎之館丁未

春旱光先憂而禱之越三日送客亭下大雨如注乃欣然交慶

焉既而秋霽欲為灾光先復禱之三日而霽乃語僚佐曰前日

雨吾儕喜於此今日晴復喜於此可謂二喜矣因以名亭張鍾峰崧

日即今之茶棚同知龔公生祠在其側焉

漏澤園按園有二一在州西一里許明成化辛丑參政邢公居政

檄知州鄧存德築於蓮盪之陽廣三十三步袤四十六步鄧存德為之記見

甯海州志 卷二 古蹟考 十八

焦志今為居民占其遺址碑記失攷一在彌勒寺舍利塔之西園中多僧塔遺址及赤脚王仙墓見楊志暨王禎撰赤脚王仙

傳

赤脚王仙墓碣按墓在彌勒塔寺之西漏澤園中明萬曆四十五

年闔州立石碣於墓前現存王仙事跡詳見王禎赤脚真人傳

文

宋文貞先生栖隱處按文貞名繼澄萊陽人明季滄桑遂徙居州

之泊子莊其子連從之事附見宋林寺趙山公傳

趙董兩義士避地處按掖縣趙伯濬士喆萊陽董樵谷樵先後避

地松椒在州南松椒社山水奇秀如畫圖俗訛稱為膏焦州牧

某惡焦字復改爲嵩陽社而松椒之名亦失故漁洋山人漫以

文登之西山當之

張鍾峰崧云松椒在甯海之西南鄉與萊陽接界故樵以爲不深而去之成山之西山今

文登人多誤以西
山爲松椒山非是

察院公館古松

按

公館在州治東偏明洪武四年知州李長慶建

知州鄧令重修廳院有奇松一株枝幹卧地盤遶起伏拳曲最

奇古見府志疑當康熙閒猶存故載於府志今併廳院遺址亦

失所在

城隍廟古松廟院有松二株西一株尤奇古殆數百年物也當時

文人爭賦詩以紀其異張崧有古松辨

約山亭在州西解家莊李大司空故宅後圃中今亦圯

大司空在
都下曾寄

甯海州志

卷二

古蹟考

十九

題新亭詩云好栽松竹護柴關更起高亭木
石閒待我回歸策杖上摩挲老眼看羣山

附

金石考

吳門顧甯人譔金石文字記搜討古碑古器已見方志者不錄有搨本者不錄冥搜幽撫不遺僻壤其山東考古錄當順治己亥歲曾到登郡適施愚山先生衡文臨登延入幕囑其警校郡志三閱月而去惜未東窮海嶼遍覽大崑崙諸勝蹟搨宋元閒碑版貯之行橐以備考核亦憾事也茲就一隅見聞撮其有關時事者以備一州掌故亦足以資多識云爾考

金石


漢半兩範

甯海州志

卷二

金石考

二十



右半兩錢漢時製造今桂山前冶頭邨地名官地掘土多錢範模滑石爲之文皆半兩疑東牟侯受封或敕賜泉局准其鑄治也桂山有銅鑛州南又有鐵官山昔或置官歟抑遍覽泉志泉譜諸籍宋元明諸儒俱未考及甯海之半兩今以模範驗之已鑿有可據後之嗜古者宜有以補之


按範長匠尺八寸厚七分

寬四寸有餘

元元帥左監軍銅印章

印長方面高匠尺寸許方紐長二寸九分寬二寸七分篆文

曰元帥左監軍印六字土人於崑崙山中掘土得之



按元初姜房以軍功封元帥左右監軍昭武大將軍總管萬戶賜以金券世襲其職此篆章其爲姜房印無疑矣

甯海州志

卷二

金石考

二十一

无染院漢石刻文

東洋誌長鎮始

齊國建立无染院是

齊魯二王聖捨山場地土邊界

東至崇石口六度院西至寨門口金鈴院南至龍門

口北至大悲頂俱是

皇恩設立永無稅糧供奉香火

峕

漢朝永康元年初修


右石刻文七十五字字八行首行第三字泐疑是誌字但文

句不可曉或是牟平古鎮名文刻於石器底面器形如香爐式高一尺四寸許寬九寸有餘長一尺七寸正面鏤人馬山水形頗工緻窩深尺今尚存本院

按永康無三年三字疑是元字之訛

麻姑梳妝閣碑

碑在崑崙麻姑殿西南峰有石龕曰梳粧閣閣旁碑高四尺寬一尺六寸石多剝蝕疑是唐宋剏建也篆精妙有古法



甯海州志

卷三

金石考

二十二

中行篆文泐只一虛字可辨額篆文曰興修虛妙真人碑記八字尚完好

大唐无染院碑文

按碑建於唐光化四年辛酉撰文書丹姓氏已缺文皆駢體

字多剝蝕可辨者其畧曰伏維我相公王千年閒器五百英雄德化青邱恩寬碧落常侍諸葛仗扶天劔應輔國星冰清蓮幕之賔月白鴈行之吏縣大夫劉琳瑯重望禮樂成家掌印判官張治民有法秉彝無私以及法主和尚道深九流德峻三峰戒珠冷而寒冰一池心印明而秋蟾五夜穿雲得法止錫巖巘逼水安禪寫心溪澗金容開千葉之蓮玉相示五

雲之瑞云云

碑陰載功德主前大順閒宮超捨山一分宋璋捨地十頃光化閒兩浙定亂安國功臣鎮海鎮

東兩軍節度使檢校太師兼中書令彭城郡王錢鏐光祿大夫檢校尚書左僕射守濰州刺史兼御史大夫錢鎮附載檀越姓氏以誌名
藍興廢之由云

姑餘大仙碑

按碑在麻姑祠後建於太平興國四年己卯譔文者潁川長

史于琛書丹者團鍊押衙于呆也文多泐不能錄

麻姑殿碑

按碑建於元豐間至國朝始毀康熙癸亥周方山來遊猶

見之遊記云碑載麻姑事甚詳云云今不可覓

宋敕賜聖壽院碑文

右碑宋熙甯元年甲申立碑文泐不可採錄有大宋國登州

甯海州志

卷二

金石考

二十三

牟平縣東牟鄉巫山保等字按黃山寺在州南百有十里聖水鄉黃山社寺之名今古未之有改也而鄉社異矣

唐臣遺骸碣文

碣高四尺共八面面寬四寸許厚廣均書大楷六面面一行行九字書小楷二面面四行楷法遒雋南渡後無此筆致惜唐臣何人瘞葬何時皆無可考

大宋宜和六年歲次甲

辰二月廿四日葬唐臣

遺骸立標識揭文制永

為瞻禮者發暴之戒云

通直郎知登州牟平縣

管句勸農公事沈栩書

亘和六年見行 敕條下項

一准律諸發冢者加役流已開棺槨者絞

一准令諸獲發冢二人比強盜諸親獲強盜每一名轉一資
一諸賞應轉資者於本職名上轉補無資可轉捕盜每轉一

資支錢五十貫

一准格諸色人親獲強盜二人轉一資錢五十貫

登州牟平縣黃壘院殿記

儒以禮立仁義無之則壞佛以律持惠定去之則喪是以離
禮於仁義者不可以吉儒異律於定惠者不可以言佛達是
道者幾其人哉邑之南有鄉曰東牟其邨曰黃壘中有尼寺
一所由其邨名爲額寺起於唐開元之際至建隆間有主尼

甯海州志

卷二

金石考

二十四

淨香住持積日累月完葺殿宇稍爲一新至至道二年堂廊
周備功力告畢遂有香幢記淨香暮年疲於主事遂傳於弟

子_缺

圓復能張大院事敬事師長每歲化緣結修功德明年

春有女子王氏本邑里人也笄年虔心出家是院修潔其身
不爲物撓居處弗雜師見而異之舉措爽朗器其名曰善甯
遂使人晝夜誦經殊無怠倦三歷明試經疏雖通奈帳籍脫
畧善甯本家_缺 遂捨已財熙甯年二十削髮愧羅漢殿庫陋
化緣遐邇經營材木五六年間髣髴前事擇吉命工拚舊一
新梁棟高不至危小不至隘旣表正而告成延塑匠而度位
滿堂佛像百彩備而儼飾精朝暮禮參心愈勤而志彌敬一

女子之心亦其偉歟今天子神聖仁孝宰輔夔龍德澤洋溢

施於方外守倅郡侯令佐縣政咸行仁化雖海隅遐僻尙文缺

物文缺非太平之世孰能致是比尼善甯文缺殿成屢求予爲文

問其興廢之由曰石文缺涌而舍利見天錫錢而清地出不知

幾百年矣得之於故老之口無所據按遂不銘載直書其事

聊記歲月云爾 紹聖四年歲次丁丑三月十日廣平宋端

符記

金李太守題九龍池詩石刻

天眷庚申下元暇日李仁仲謁姑餘迴訪九龍池作

游宦驅馳厭苦辛悠然乘暇訪虛真探幽敢憚賦山鬼涉險

甯海州志

卷二

金石考

二十五

何辭謁水神池沼有爲興雨露仙山無許見烟塵注有兵火云云風

雲肯假幽人力更放清流濟遠民

右石刻在九龍池旁額有太守李公題五大字楷書秀潤詩

欵悉用行書亦復流逸可愛惜字多泐按甯海軍官階有刺史而無太守之銜疑

李仁仲之稱太守或登州守歟而郡志闕如存此以便考核

金范殿試跋歸山操後

吾鄉劉宜之郡城之北有庵一所寬閒深靚以館四方雲水

之士命僧燭律師主之燭一曰竺予因暇日與丹陽馬真人嘗游

息其中名之曰三教堂一日焚香晏坐有鄜州道士王公抱

琴而來作金石弄其聲清越遠山與之俱應真人作歸山操

以示衆人皆升仙妙語無一點塵氣人敬愛之噫真人已羽化矣斯文不可復得命工刻之於石用傳不朽耳 大定甲辰中元日州學正范懌跋男景仁書

右石刻在遇仙宮東壁操見藝文下卷范狀元詳見甲科范懌本傳

劉忠碑

竊以甯海州牟平縣十九都劉家介祖居劉公諱忠字孝卿幼讀傳書長習吏事大德元年有本州達魯花赤不老赤次劉忠其德舉充文牟二縣請俸司吏一百餘日遷充本州下地倉官三界掌官印信收受錢糧三萬餘石並無失閒次充本州請俸司吏三十餘月陞充益都路吏退役侍父母享年

甯海州志

卷二

金石考

二十六

九旬歸世劉忠壽年七旬

至正四年月日

文載張崧藝文備覽集

張中峰崧注云吾家有老瓦屋蓋金元時所築也屋角一瓦上有銘云甯海州牟平縣十八都白水村瓦匠人呂共三行行六字末二字泐不可辨矣合劉忠碑觀之當時分里皆以都名與文登無異但其詳則不可考也按宋時牟平縣分三鄉見寰宇記及黃壘院殿記

明敕頒藏經璽詔

敕諭崑崙山道衆人等朕發誠心印造道大藏經頒施在京及名山宮觀供奉經首護敕朕已諭其由爾住持及道衆人等務要虔奉朝夕禮誦保安藐躬康泰宮壺肅清懺已往愆尤無疆福壽民安國泰天下太平俾四海八方同歸清靜朕

成恭已無爲之治道焉今特遣御馬監張簡齋請前去彼處

供安各宜仰體知悉欽哉

萬曆三十九年四月廣通寶 璽詔

留松碑記

留

松當甯海交登之衝行人藉爲避暑息肩地下蔭磐石周夾羣峰一株特秀頗具石橋南畔筆意匠氏購之將翦伐會文邑業儒者赴郡試出賞留之事甚韻余省方經此聞而義之紀諸石其人與其樹殆不朽云

松

耐寒清暑

碑

記

乾隆甲戌季秋上浣 東海使者熊繹祖書

右碑在福峴日東麓官道旁中行四大字作行書徑八寸許極雋拔遒勁之致題額用八分書兩旁跋款作小

甯海州志

卷二

金石考

二十七

楷亦整嚴有古法松雖至今不存而碑刻了然獨在也

高鳳翰題壁雙鉤石刻

右碑刻在松泉觀南廊壁間按 雍正丁未南阜過此謁成州

牧毅庵題二律詩載藝文書法用行草有龍跳虎卧之勢高

軒過者輒紆道來觀經久漸剝落諸生宮卜萬雙鉤摹勒諸

石砌之大殿北簷下而原墨仍在焉